

Was merr so babbelt

Wo warsde dann so long?
Ei oikaafe. Warum?
Weilde so long gebliwwe bist.
Ich habb halt noch e bisje geschwätzt.
Dess muss aach emol soi.
Ich soll derr aach enn scheene Gruß ausrichte.
So? Wer hotten den ausgericht?
De Herr Peterle.
Peterle? Kenn ich nit.
Den kennsde. Der dich immer so freundlich grießt.
Dann misd ich den kenne. Von dene gibts nit vill.
Schleechtschwätzer. Klar kennsde den.
Iss dess so enn kloone mettere Glatz?
Naa, dess iss enn große Monn mett graue Hoorn.
Wie alt iss der dann?
So iwwer die Sechzich.
Wo wohnden der?
Ich glaab die wohne in de Edderschemer Strooß.
Was fährt der ferr Audo?
Dess waaß ich nit. Awwer du kennst den Monn.
Peterle? Peterle? Ach ja, der hott enn Schäferhund.
So? Naa, den habb ich noch nie mettem Hund geseh.
Dann issers nit.
Den kennsde. Der fährt oft mettem Fahrrad dorchs Feld.
Mettem Fahrrad dorchs Feld? Von dene gibts vill.
Awwer der grießt dich aach dann immer so freundlich.
Ich waaß nit wen du moonst. Iss joo aach egal.
Dess iss nit egal. Immerhie hott der mir enn scheene Gruß ferr dich ausgericht.
Awwer wenn ich den Monn doch nit kenne due.
Warte mol, jetz kimmsde druff. Weil den hawwe merr deletzt on de Wart getroffe.
On de Wart?
Ja, de Peterle unn soi Fraa hawwe newer uns gesotze.
Was hotten der ferr e Fraa?
So e kloo Fraa mettere Dutt.
Enn große Monn unn e kloo Fraa mettere Dutt? On de Wart?
Ei sicher. Ihr habt noch iwwer die Londebohn geschwätzt.
Unn?
Die warn aach degeeche.
Ach ja, jetz waaß ich wen du moonst.
No siehsde.
Awwer dass die Peterle haaße wusst ich nit.
Doch, Peterle haaße die.
No ja, dann saachsde bei Geleechenheit dem Peterle aach enn scheene Gruß von mir.
Konn ich mache, awwer der hott den scheene Gruß nor ausgericht.

Ausgericht? Ei von wem war dann der scheene Gruß?
Von soim Schwoocher, dem Klaus Schärf.
Klaus Schärf? Kenn ich nit.
Jetzt machs awwer halblong! Dess iss doch der, der ...

Eiern Honnes